

四庫全書

子部

欽定四庫全書

子部

圖書見聞誌目錄卷三至

詳校官中書臣王鵬

檢討臣德生覆勘

覆校官中書臣田尹衡

校對官中書臣鮑之鍾

謄錄監生臣袁繼升

欽定四庫全書

子部八

圖畫見聞誌目錄

藝術類一書畫之屬

卷一

敘論

卷二

紀藝上

唐末二十七人
五代九十二人

卷三

紀藝中

皇朝建隆元年後至熙寧七年總一百六十六人此卷盡六十八人王公大夫

十三人高嵩二人人物
門四十六人傳寫七人

卷四

紀藝下
此卷盡九十八人山水門二十四人
花鳥門三十九人雜畫門二十五人

卷五

故事拾遺
唐朝 朱梁 王蜀
總二十七事

卷六

近事
皇朝 孟蜀 大遼
高麗 總三十二事

臣等謹案圖畫見聞誌六卷宋郭若虛撰若

虛不知何許人書中有熙寧辛亥冬被命接
勞北使為輔行語則嘗有位於朝者陳振孫
云自序在元豐中稱大父司徒公未知何人
郭氏在國初無顯人但有郭承祐耳然今考
史傳並郭承祐亦不載莫之詳也其書以張
彥遠歷代名畫記絕筆唐末因續為裒輯歷
五代至熙寧七年而止分叙事記藝故事拾
遺近事四門所誌名人藝士流派本末頗稱

賅脩視劉道醇黃休復諸家為詳其論製作之理亦能深得畫旨故馬端臨以為看畫之綱領惟經籍考作名畫見聞志而宋史藝文志通志藝文畧所載其名並與今本同疑經籍考傳寫有誤也乾隆四十一年十二月恭校上

總纂官臣紀昀臣陸錫熊臣孫士毅

總校官臣陸費墀

圖畫見聞誌原序

余大父司徒公雖貴仕而喜廉退恬養自公之暇惟以詩書琴畫爲適時與丁晉公馬正惠蓄書畫均故畫府稱富焉先君少列躬蹈懿節鑒裁精明珍藏罔墜欲養不待臨言感噎後因諸族人閒取分玩緘滕罕嚴日居月諸漸成淪弃賤子雖甚不肖然於二世之好敢不欽藏嗟乎逮至弱年流散無幾近歲方購尋遺失或於親戚間以他玩交酬凡得十餘卷皆傳世之寶每宴坐虛

庭高懸素壁終日幽對愉愉然不知有天地之大萬物之繁況乎驚寵辱於勢利之場料得喪於犇馳之域者哉復遇朋遊覲止互出名蹤東論得以資談銓較由之廣博雖不與戴謝並生愚竊慕焉又好與當世名手甄明體灑講練精微凡所見聞當從實錄昔唐張彥遠字愛賓嘗著歷代名畫記其間自黃帝時史皇而下總括畫人姓名絕筆於永昌元年厥後撰集者率多相亂事既重疊文亦繁衍今考諸傳記參較得失續自永昌元年

後歷五季通至本朝熙寧七年名人藝士編而次之其
有畫蹟尚晦於時聲聞未喧於衆者更俟將來亦嘗覽
諸家畫記多陳品第今之作者互有所長或少也嫩而
老也壯或始也勤而終也怠今則不復定品惟筆其可
紀之能可談之事暨諸家畫說略而未至者繼以傳記
中述畫故事并本朝事蹟採摭編次離爲六卷目之曰
圖畫見聞誌後之博雅君子或加點竄將可取於萬一
郭若虛序

欽定四庫全書

圖畫見聞誌卷一

宋 郭若虛 撰

叙諸家文字

自古及近代紀評畫筆文字非一難悉具載聊以其所見聞篇目次之 凡三十家

名畫集

南齊高帝撰

古畫品錄

謝赫撰

裝馬譜

毛惠遠撰

昭公錄

梁武帝撰

僧繇錄

亡名氏

畫說文

亡名氏

述畫記

後魏孫暢之撰

續畫品錄

陳姚最撰

後畫錄

唐沙門彥悰撰

畫斷

張懷瓘撰

名畫獵精錄

亡名氏撰

後畫品錄

李嗣真撰

雜色駿騎錄

韓幹撰

繪境

張璪撰

畫評

顧況撰

續畫評

劉整撰

公私畫錄

裴孝源撰

畫拾遺錄

竇蒙撰

畫山水錄

吳恬撰一名玠

唐朝名畫錄

朱景真撰

歷代名畫記

張彥遠撰

畫山水訣

荆浩撰一名洪谷子

梁朝畫目

亡名氏

廣畫新集

蜀沙門仁顯撰

益州畫錄

辛顯撰

江南畫錄

亡名氏

江南畫錄拾遺

徐鉉撰

廣梁朝畫目

皇朝胡嶠撰

總畫集

黃休復撰

本朝畫評

劉道醇纂符嘉應撰

叙國朝求訪

畫之源流諸家脩載爰自唐季兵難五朝亂離圖畫之
好乍存乍失逮我宋上符天命下順人心肇建皇基肅
清六合沃野謳歌之際復見堯風坐客閒宴之餘兼窮

繪事太宗皇帝欽明濬哲富藝多才時方諸僞歸真四
荒重譯萬幾豐暇屢購珍奇太平興國間詔天下郡縣
搜訪前哲墨蹟圖畫先是荆湖轉運使得漢張芝草書
唐韓幹馬二本以獻之韶州得張九齡畫像并文集九
卷表進後之繼者難可勝紀又勅待詔高文進黃居寀
搜訪民間圖畫端拱元年以崇文院之中堂置祕閣命
吏部侍郎李至兼祕書監點檢御圖書選三館正本
書萬卷實之祕監以進御還餘藏於閣內又從中降圖

畫并前賢墨蹟數千軸以藏之淳化中閣成上飛白書額親幸召近臣縱觀圖籍賜宴又以供奉僧元霑所寫御容二軸藏於閣又有天章龍圖寶文三閣後苑有圖書庫皆藏貯圖書之府祕閣每歲因暑伏曝襲近侍暨館閣諸公張筵縱觀圖典之盛無替天祿石渠妙楷寶蹟矣

敘自古規鑒

易稱聖人有以見天下之賾而擬諸其形容象其物宜

是故謂之象又曰象也者像此者也嘗考前賢畫論首稱像人不獨神氣骨灋衣紋向背爲難蓋古人必以聖賢形像徃昔事實舍毫命素製爲圖畫者要在指鑒賢愚發明治亂故魯殿紀興廢之事麟閣會勲業之臣蹟曠代之幽潛託無窮之炳煥昔漢孝武帝欲以鉤弋趙婕妤少子爲嗣命大臣輔之惟霍光任重大可屬社稷乃使黃門畫者畫周公輔成王朝諸侯以賜光孝成帝遊於後庭欲以班婕妤同輦載婕妤辭曰觀古圖畫聖

賢之君皆有名臣在側三代末主乃有嬖倖今欲同輦
得無近似之乎上善其言而止太后聞之喜曰古有樊
姬今有班婕妤又嘗設宴飲之會趙李諸侍中皆引滿
舉白談笑大噱時乘輿幄坐張畫屏風畫紂醉踞妲己
作長夜之樂上因顧指畫問班伯曰紂爲無道至於是
乎伯曰書云乃用婦人之言何有踞肆於朝所謂衆惡
歸之不如是之甚者也上曰苟不若此此圖何戒伯曰
沈湎於酒微子所以告去也式號式譟大雅所以流連

也謂書淫亂之戒其原在於酒上喟然歎曰久不見班
生今日復聞讜言後漢光武明德馬皇后美於色厚於
德帝用嘉之嘗從觀畫虞舜見娥皇女英帝指之戲后
曰恨不得如此爲妃又前見陶唐之像后指堯曰嗟乎
羣臣百僚恨不得爲君如是帝顧而笑唐德宗詔曰貞
元己巳歲秋九月我行西宮瞻閣崇構見老臣遺像
颯然肅然和敬在色想雲龍之叶應感致業之艱難觀
往思今取類非遠文宗大和二年自撰集尚書中君臣

事蹟命畫工圖於太液亭朝夕觀覽焉漢文翁學堂在益州大城內昔經頽廢後漢蜀郡太守高朕復繕立乃圖畫古人聖賢之像及禮器瑞物於壁唐韋機爲檀州刺史以邊人僻陋不知文儒之貴修學館畫孔子七十二弟子漢晉名儒像自爲讚敦勸生徒繇茲大化夫如是豈非文未盡經緯而書不能形容然後繼之於畫也所謂與六籍同功四時並運亦宜哉

叙圖畫名意

古之祕畫珍圖名隨意立典範則有春秋毛詩論語孝

經爾雅等圖

上古之畫多遺其姓

其次後漢蔡邕有講學圖梁張

僧繇有孔子問禮圖隋鄭濬士有明堂朝會圖唐閻立

德有封禪圖尹繼昭有雪宮圖觀德則有帝舜娥皇女

英圖

亡名氏

隋展子虔有禹治水圖晉戴逵有列女仁智

圖宋陸探微有勲賢圖忠鯁則隋楊契丹有辛毗引裾

圖唐閻立本有陳元達鑠諫圖吳道子有朱雲折檻圖

高節則晉顧凱之有祖二疏圖王廙有木鴈圖宋史藝

有屈原漁父圖南齊蘧伯珍有巢由洗耳圖壯氣則魏
曹髦有卞莊刺虎圖宋宗炳有師子擊象圖梁張僧繇
有漢武射蛟圖寫景則晉明帝有輕舟迅邁圖衛協有
穆天子醺瑤池圖史道碩有金谷園圖顧凱之有雪霽
望五老峰圖靡麗則晉戴逵有南朝貴戚圖宋袁倩有
丁貴人弢曲項琵琶圖唐周昉有楊妃架雪衣女亂雙
陸局圖風俗則南齊毛惠遠有剡中溪谷村墟圖陶景
真有永嘉屋邑圖隋楊契丹有長安車馬人物圖唐韓

滉有堯民鼓腹圖以上圖畫雖不能盡見其蹟前人載之甚詳但愛其佳名聊取一二類而錄之

論製作楷模

大率圖畫風力氣韻固在當人其如種種之要不可不察矣畫人物者必分貴賤氣貌朝代衣冠釋門則有善巧方便之顏道像必具修真度世之範帝皇當崇上聖天日之表外夷應得慕華欽順之情儒賢即見忠信禮義之風武士固多勇悍英烈之貌隱逸俄識肥遯高世

之節貴戚蓋尚紛華侈靡之容帝釋須明威福嚴重之

儀鬼神乃作醜醜

尺者切

馳趙

于鬼切

之狀士女宜富秀色

倭

鳥果切

媚

奴坐切

之態田家自有醇眊朴野之真恭驚愉

慘又在其間矣畫衣紋林石用筆全類於書畫衣紋有

重大而調暢者有縝細而勁健者勾綽縱掣理無妄下

以狀高側深斜卷摺飄舉之勢畫林木者有膠枝挺幹

屈節皴皮紐裂多端分數萬狀作怒龍驚虺之勢聳凌

雲翳日之姿宜須崖岸豐隆方礪蟠根老壯也畫山石

者多作磬頭亦爲凌面落筆便見堅重之性皴淡即生

眾凸之形每留素以成雲或借地而爲雪其破墨之功

尤爲難也畫畜獸者全要停分向背筋力精神肉分肥

圈毛骨隱起仍分諸物所稟動止之性四足惟兔掌底有毛謂之建毛

畫龍者析出三停自首至膊膊至腰腰至尾也分成九似角似鹿頭似駝眼似

鬼項似蛇腹似蜃鱗似魚爪似鷹掌似虎耳似牛窮游泳蜿蜒之妙得回蟠升

降之宜仍要駿鬣肘毛筆畫壯快直自肉中生出爲佳

也凡畫龍開口者易爲巧合口者難爲功畫家稱開口貓兒合口龍言其兩難也畫水者有一

擺之波三摺之浪布之字之勢分虎爪之形湯湯若動
使觀者浩然有江湖之思爲妙也畫屋木者折算無虧
筆畫勻壯淡遠透空一去百斜如隋唐五代已前洎國
初郭忠恕王士元之流畫樓閣多見四角其斗拱逐鋪
作爲之向背分明不失繩墨今之畫者多用直尺一就
界畫分成斗拱筆蹟繁雜無壯麗閒雅之意畫花果草
木自有四時景候陰陽向背筍條老嫩苞萼後先逮諸
園蔬野草咸有出土體柱畫翎毛者必須知識諸禽形

體名件自紫喙口臉眼緣去聲叢林腦毛披蓑毛翅有梢

去聲翅有蛤翅翅邦上聲上有大節小節大小窩翎次及六

梢又有料平聲風掠草彌縫翅習之間散尾壓磳尾肚毛腿袴尾

錐脚有探爪三節食爪二節擦爪四節托爪一節宣黃八甲鷺鳥

眼上謂之看棚一名看簷背毛之間謂之合溜山鵲鷄類各

有歲時蒼嫩皮毛眼爪之異家鵝鴨即有子肚野飛水

禽自然輕梢去聲如此之類或鳴集而羽翮緊戢或寒棲

而毛葉鬆泡去聲已上具有名體處所必須融會闕一不

可設或未識漢殿吳殿梁柱斗拱叉手替木熟柱駝峰
方莖額道抱間昂頭羅花羅幔暗制綽幕猢猻頭琥珀
枋龜頭虎座飛簷撲水膊風化廢垂魚惹草當鈎曲脊
之類憑何以畫屋木也畫者尚罕能精究沉觀者乎

論衣冠異制

自古衣冠之制存有變更指事繪形必分時代袞冕灋
服三禮備存物狀實繁難可得而載也漢魏已前始戴
幅巾晉宋之世方用冪羅後周以三尺阜絹向後幘髮

名折上巾通謂之幘頭武帝時裁成四腳隋朝惟貴臣

服黃綾紋袍烏紗帽九環帶六合靴

起於後魏

次用桐木黑

漆爲巾子裹於幘頭之內前繫二腳後垂二腳貴賤服之而烏帽漸廢唐太宗嘗服翼善冠貴臣服進德冠至則天朝以絲葛爲幘頭巾子以賜百官開元間始易以羅又別賜供奉官及內臣團頭宮樣巾子至唐末方用漆紗裹之乃今幘頭也三代之際皆衣襴衫秦始皇時以紫緋綠袍爲三等品服庶人以白國語曰袍者朝也

古公卿上服也至周武帝時下加襴唐高宗朝給五品已上隨身魚又勅品官紫服金玉帶淺淺緋服並金帶淺淺綠服並銀帶淺淺青服並鍤石帶庶人服黃銅鐵帶一品已下文官帶手巾篋帋刀子礪石武官亦聽睿

宗朝制武官五品已上帶七事跣蹠

佩刀子磨石契
苾真噦厥針筒火

石袋也

開元初復罷之晉處士馮翼衣布大袖周緣以皁

下加襴前繫二長帶隋唐朝野服之謂之馮翼之衣今

呼爲直裰

禮記儒行篇魯哀公問於孔子曰夫子之服其儒服與孔子對曰丘少居魯衣逢掖之衣

長居宋冠章甫之冠注云逢大也大掖大袂禪衣也逢掖與馮翼音相近

又梁志有袴褶以

從戎事三代已前人皆跣足三代已後始服木屐伊尹

以草爲之名曰屨秦世參用絛草鞞本胡服趙靈王好

之制有司衣袍者宜穿皐鞞唐代宗朝令宮人侍左右

者穿紅錦鞞凡在經營所宜詳辯至如閭立本圖昭

君妃

音配

虜戴帷帽以據鞍王知慎畫梁武南郊有衣冠

而跨馬殊不知帷帽創從隋代軒車廢自唐朝雖弗害

爲名蹤亦丹青之病爾

帷帽如今之席帽周回垂網也

論氣韻非師

謝赫云一曰氣韻生動二曰骨灋用筆三曰應物像形
四曰隨類傳彩五曰經營位置六曰傳模移寫六灋精
論萬古不移然而骨灋用筆以下五灋可學如其氣韻
必在生知固不可以巧密得復不可以歲月到默契神
會不知然而然也嘗試論之竊觀自古奇蹟多是軒冕
才賢巖穴上士依仁游藝探蹟鉤深高雅之情一寄於
畫人品既已高矣氣韻不得不高氣韻既已高矣生動

不得不至所謂神之又神而能精焉凡畫必周氣韻方號世珍不爾雖竭巧思止同衆工之事雖曰畫而非畫故楊氏不能授其師輪扁不能傳其子繫乎得自天機出於靈府也且如世之相押字之術謂之心印本自心源想成形跡跡與心合是之謂印爰及萬灋緣慮施爲隨心所合皆得名印矧乎書畫發之於情思契之於綃楮則非印而何押字且存諸貴賤禍福書畫豈逃乎氣韻高卑夫畫猶書也揚子曰言心聲也書心畫也聲畫

形君子小人見矣

論用筆得失

凡畫氣韻本乎游心神彩生於用筆用筆之難斷可識
矣故愛賓稱惟王獻之能爲一筆書陸探微能爲一筆
畫無適一篇之文一物之像而能一筆可就也乃是自
始及終筆有朝揖連綿相屬氣脈不斷所以意存筆先
筆周意內畫盡意在像應神全夫內自足然後神閒意
定神閒意定則思不竭而筆不困也昔宋元君將畫圖

衆史皆至受揖而立紙筆和墨在外者半有一史後至者儻儻然不趨受揖不立因之舍公使人視之則解衣槃礴羸君曰可以是真畫者也又畫有三病皆繫用筆所謂三者一曰版二曰刻三曰結版者腕弱筆癡全虧取與物狀平褊不能圜混也刻者運筆中疑心手相戾勾畫之際妄生圭角也結者欲行不行當散不散似物凝礙不能流暢也未窮三病徒舉一隅畫者鮮克留心觀者當煩拭背

大底氣韻高筆畫壯則愈玩愈妍其或格凡毫孺初觀縱似可採久之還復意

矣息

論曹吳體澹

曹吳二體學者所宗按唐張彥遠歷代名畫記稱北齊曹仲達者本曹國人最推工畫梵像是爲曹謂唐吳道子曰吳吳之筆其勢圜轉而衣服飄舉曹之筆其體稠疊而衣服緊窄故後輩稱之曰吳帶當風曹衣出水又按蜀僧仁顯廣畫新集言曹曰昔竺乾有康僧會者初入吳設像行道時曹不興見西國佛畫儀範寫之故天

下盛傳曹也又言吳者起於宋之吳璵之作故號吳也
且南齊謝赫云不興之蹟代不復見惟祕閣一龍頭而
已觀其風骨擅名不虛吳璵之說聲微蹟曖世不復傳
謝評云擅美當年有聲京洛在第三品江僧寶下也至如仲達見北齊之朝距唐

不遠道子顯開元之後繪像仍存證近代之師承合當
時之體範況唐室已上未立曹吳豈顯釋寡要之談亂
愛賓不刊之論推時驗蹟無愧斯言也

雕塑鑄像
亦本曹吳

論吳生設色

吳道子畫今古一人而已愛賓欄前不見顧陸後無來者不其然哉嘗觀所畫牆壁卷軸落筆雄勁而傳彩簡淡或有牆壁間設色重處多是後人裝飾至今畫家有輕拂丹青者謂之吳裝

雕塑之像亦有吳裝

論婦人形相

歷觀古名士畫金童玉女及神仙星官中有婦人形相者貌雖端嚴神必清古自有威重儼然之色使人見則肅恭有歸仰心今之畫者但貴其姱麗之容是取悅於

衆目不達畫之理趣也觀者察之

論收藏聖像

論者或曰不宜收藏佛道聖像恐其褻慢葷穢難可時
時展玩愚謂不然凡士君子相與觀閱書畫爲適則必
處閒靜但鑒賞精能瞻崇遺像惡有褻慢之心哉且古
人所製佛道功德則必專心勵志曲盡其妙或以希福
田利益是其尤爲著意者況自吳曹不興晉顧愷之戴
逵宋陸探微梁張僧繇北齊曹仲達隋鄭凜士楊契丹

唐閻立本閻立德吳道子周昉盧楞伽之流及近代侯
翼朱繇張圖武宗元王瓘高益高文進王霽孫夢卿王
道真李用及李象坤蜀高道興孫位孫知微范瓊勾龍
爽石恪金水石城張玄蒲師訓江南曹仲玄陶守立王
齊翰顧德謙之倫無不以佛道爲功豈非釋梵莊嚴真
仙顯化有以見雄才之浩博盡學志之精深者乎是知
云不宜收藏者未爲要說

論三家山水

畫山水惟營丘李成長安關同輩原范寬智妙入神才高出類三家鼎峙百代標程前古雖有傳世可見者如

王維李思訓荆浩之倫豈能方駕近代雖有專意力學

者如翟院深劉永紀真之輩難繼後塵

翟學李劉學夫關紀學范

氣象蕭疎煙林清曠毫鋒穎脫墨瀟精微者營丘之製

也石體堅凝雜木豐茂臺閣古雅人物幽閒者關氏之

風也峯巒渾厚勢狀雄強槍

上聲

筆俱勻人屋皆質者范

氏之作也

烟林平遠之妙始自營丘畫松葉謂之攢針筆不染淡自有榮茂之色關畫木葉間用墨

搢時出枯梢筆蹤勁利學者難到范畫林木或側形如偃蓋別是一種風規但未見畫松柏耳畫屋既質以墨籠染後輩復有王士元王端燕貴許道寧高克明郭熙目爲鉄屋

李宗成丘訥之流或有一體或具體而微或預造堂室或各開戶牖皆可稱尚然藏畫者方之三家繇諸子之

於正經矣

闕同雖師荆浩蓋青出於藍也

論黃徐體異

諺云黃家富貴徐熙野逸不惟各言其志蓋亦耳目所習得之於手而應於心也何以明其然黃筌與其子居

宋始竝事蜀爲待詔筌後累遷如京副使既歸朝筌領

真命爲宮贊

或曰筌到關未久物故今之遺跡多見在蜀中日作故往往有廣政年號宮贊之命

亦恐傳之誤

居宋復以待詔錄之皆給事禁中多寫禁籙所

有珍禽瑞鳥竒花怪石今傳世桃花鷹鵠純白雉兔金

盆鷓鴣孔雀龜鶴之類是也又翎毛骨氣尚豐滿而天

水分色徐熙江南處士志節高邁放達不羈多狀江湖

所有汀花野竹水鳥淵魚今傳世鳬鴈鷺鶩蒲藻蝦魚

叢豔折枝園蔬藥苗之類是也又翎毛形骨貴輕秀而

天水通色

言多狀者緣人之稱聊分兩家作用亦在臨時命意大抵江南之藝骨氣多不及蜀人而

瀟灑過之也

二者春蘭秋菊各擅重名下筆成珍揮毫可範

復有居宋兄居寶徐熙之孫曰崇嗣曰崇矩蜀有刁處

士

名光

劉贊滕昌祐夏侯延祐李懷衮江南有唐希雅

希雅之孫曰中祚曰宿及解處中輩都下有李符李吉

之儔及後來名手間出跋望徐生與二黃繇山水之有

三家

黃筌之師刁處士繇關同之師荆浩

論畫龍體要

畫龍惟五代四明僧傳古大師其名最著觀其體則筆

墨適爽善爲蜿蜒之狀

皇建院法堂屏風是其真蹟

至任從一待詔

之作稍加怪怒

建隆觀翊教院玉皇殿後是其真蹟

今崔白所圖又得其

要

建隆觀翊教院玉皇殿中羅喉邊有一龍頭北都大安寺羅漢壁有龍一條

恨不見不興

祕閣之頭軌範同否又不知葉公當日所遇厥狀何如

自昔豢龍氏歿龍不復擾所謂上飛于天晦隔層雲下

歸于泉溪入無底人不可得而見也今之圖寫固難惟

以形似但觀其揮毫落墨筋力精神理契吳畫鬼神

前論

三停九似亦以人多不識
真龍先匠所遺傳授之法

論古今優劣

或問近代至藝與古人何如荅曰近代方古多不及而
過亦有之若論佛道人物士女牛馬則近不及古若論
山水林石花竹禽魚則古不及近何以明之且顧陸張

吳中及二閭皆純重雅正性出天然

晉顧愷之宋陸探微梁張僧繇唐閭

立本閭立德暨吳道子也

吳生之作爲萬世灋號曰畫聖不亦宜哉

已上皆極佛道人物

張周韓戴氣韻骨灋皆出意表

唐張萱周昉皆工士女韓

幹畫馬戴嵩工牛或問曰何以但舉韓幹而不言曹霸止引戴嵩而不稱韓滉荅曰韓師曹將軍戴法韓晉公但舉其弟可知其師也至如韋鑒暨猶子鷗皆善畫馬但取其尤著者明之難即遍舉也後之學者

終莫能到故曰近不及古至如李與關范之蹟徐暨二黃之蹤前不藉師資後無復繼踵借使二李三王之輩復起邊鸞陳庶之倫再生亦將何以措手於其間哉故

曰古不及近

二李則李思訓將軍并其子李昭道中舍三王則王維右丞暨王熊王宰悉工山水

邊鸞陳庶工花鳥竝唐人也

是以推今考古事絕理窮觀者必辨金

鏞無焚玉石

圖畫見聞誌卷一

欽定四庫全書

圖畫見聞誌卷二

宋 郭若虛 撰

紀藝上

唐永昌元年後盡五代凡一百一十八人

唐末二十七人

左 全

趙公祐

趙溫其

趙德齊

范 瓊

陳 皓

彭 堅

常 粲

常重肩

呂堯

竹虔

孫遇

張詢

張南本

麻居禮

張素卿

陳若愚

胡瓌
子虔

荆浩

刁光胤

尹繼昭

李洪虔

辛澄

張騰

張贊

王浹

五代九十一人

于兢

趙鼎

劉彥齊

袁義

羅塞翁

東丹王

胡擢

胡翼

王殷

李羣

燕筠

杜霄

李玄應弟審

厲歸真

李靄之

韋道豐

朱簡章

王喬士

鄭唐卿

關同

支仲元

枚行思

郭乾暉

鍾隱

郭權

史瓊

程凝

王道古

李坡

唐垓

王道求

宋卓

富玫

左禮

張南

王偉

黃延浩

張質

韓求

李祝

張圖

朱繇

李昇

杜楷

杜子瓌

杜弘義

房從真

宋藝

高道興

阮知晦

杜齟龜

黃筌

高從遇

阮惟德

杜敬安

黃居寶

趙元德

趙忠義

蒲師訓

蒲延昌

張玫

徐德昌

周行通

張玄

孔嵩

丘文播
弟文曉

趙才

滕昌祐

姜道隱

楊元真

董從晦

張景思

跋異

王仁壽

衛賢

朱棕

曹仲玄

陶守立

竹夢松

丁謙

何遇

陸晁

施璘

貫休

楚安

傅古

弟子岳
閣黎

智蘊

德符

唐末二十七人

左全蜀郡人蹟本儒家世傳圖畫妙工佛道人物寶曆

中聲馳宇內成都長安畫壁甚廣多放吳生之蹟頗得其要有佛道功德五帝三官等像傳於世

趙公祐成都人工畫佛道鬼神世稱高絕大和間已著畫名李德裕鎮蜀以賓禮遇之改蒞浙西辟從蓮幕成都大慈聖興兩寺皆有畫壁

趙溫其公祐之子綽有父風成都寺觀多見其蹟

趙德齊溫其之子襲二世之精藝奇縱逸筆時輩咸推伏之光化中詔許王建於成都置生祠命德齊畫西平

王儀仗車輅旌纛灋物及朝真殿上畫后妃嬪御皆極精緻昭宗恩之遷翰林待詔

辛顯評溫其與德齊皆次公祐之品

范瓊陳皓彭堅三人同時同藝名振三川大中初復興佛宇後三人分畫成都大慈聖壽聖興淨衆中興等五

寺牆壁二百餘間各盡所蘊淳化後兩遭兵火頗有毀

廢矣

辛顯云范爲神品陳彭爲妙品仁顯云范陳爲妙品上彭爲妙品嘗見文潞公家墳寺積慶院有移

置壁畫婆叟仙一軀乃范瓊所作辛顯評爲神品當矣

常祭成都人工畫佛道人物善爲上古衣冠咸通中路

巖鎮蜀頗加禮遇有孔子問禮山陽七賢等圖并立釋迦女媧伏羲神農燧人等像傳於世

常重脩祭之子妙工寫貌僖宗朝爲翰林供奉嘗寫僖宗御容及名臣真像得其神彩亦曾於寶曆寺畫請塔天王至妙

呂堯竹虔並長安人工畫佛道人物僖宗朝爲翰林待詔廣明中扈從入蜀長安成都皆有畫壁

孫遇自稱會稽山人志行孤潔情韻疎放廣明中避地

入蜀遂居成都善畫人物龍水松石墨竹兼長天王鬼神筆力狂怪不以傅彩爲功長安蜀川皆有畫壁實奇

蹟也初名位後改名遇亦有圖軸傳於世

仁顯評逸品

張詢南海人避地居蜀善畫吳山楚岫枯松怪石中和間嘗於昭覺寺大悲堂後畫三壁山川一壁早景一壁午景一壁晚景謂之三時山人所稱異也亦有山水卷軸傳於世

張南本不知何許人工畫佛道鬼神兼精畫火嘗於成

都金華寺大殿畫八明王時有一僧遊禮至寺整衣升
殿驟覩炎炎之勢驚怛幾仆時孫遇畫水南本畫火水
火之形本無定質惟於二子冠絕古今又嘗畫寶曆寺
水陸功德曲盡其妙後來爲人摹寫竊換真蹟鬻與荆
湖商賈今所存者多是僞本別有勘書詩會高麗王行
香等圖傳於世

麻居禮蜀人師張南本光化天復間聲蹟甚高資簡印
蜀甚有其筆

道士張素卿簡州人少孤貧落魄長依本郡三清觀頂
挂善畫道門尊像天帝星官形製奇古實天授之性也
嘗於青城山丈人觀畫五嶽四瀆十二溪女等兼有老
子過流沙并朝真圖八仙九曜十二真人等像傳於世
道士陳若愚左蜀人師張素卿得其筆灑成都精思觀
有青龍白虎朱雀玄武四君像

胡瓌范陽人工畫蕃馬雖繁富細巧而用筆清勁至於
穹廬什器射獵生死物靡不精奇凡畫駝馬駿尾人衣

毛毳以狼毫縛筆疏渲之取其纖健也有陰山七騎下
程挺馬射雕等圖傳於世子虔有父風

荆浩河內人博雅好古善畫山水自撰山水訣一卷爲
友人表進祕在省閣常自稱洪谷子語人曰吳道子畫
山水有筆而無墨項容有墨而無筆吾當采二子之所
長成一家之體故關同北面事之有四時山水三峯桃
源天台等圖傳於世

刁光胤長安人天復中避地入蜀工畫龍水竹石花鳥

貓兔黃筌孔嵩皆門弟子嘗於大慈寺承天院內窗邊
小壁四堵上畫四時花鳥體製精絕後黃居寀重裝飾
之亦有圖軸傳於世

尹繼昭不知何許人工畫人物臺閣世推絕格有移新
豐阿房宮吳宮等圖傳於世

李洪度成都人工畫佛道人物名振當時成都大慈寺
三學院等處有畫壁

辛澄不知何許人成都大慈寺泗州堂有僧伽像及普

賢閣下有五如來像

張騰不知何許人工佛道雜畫描作布色頗窮其妙成
都聖興寺有畫壁

張贊河陽人工畫佛道人物雜中有寺壁

王洙不知何許人工畫人物錢忠懿家有導引圖

五代九十一人

梁相國于兢善畫牡丹幼年從學因覩學舍前檻中牡
丹盛開乃命筆放之不洩旬奪真矣後遂酷思無倦動

必增奇貴達之後非尊親旨命不復含毫有人贈詩曰
看時人步澀展處蜚爭來有寫生全本折枝傳於世

梁駙馬都尉趙嵩善畫人馬挺然高格非衆人所及有
漢書西域傳骨貴馬小兒戲舞鍾馗彈碁診脉等圖傳
於世

梁左千牛衛將軍劉彥齊善畫竹頗臻清致有風折竹

孟宗泣竹湘妃等圖傳於世

人物多假
胡翼之手

後唐侍衛親軍袁義河南登封人善畫魚謹密形似外

得噉啍游泳之態有卷軸傳於世

羅塞翁錢尚父時爲吳中從事錢塘令隱之子善畫羊
世罕有其蹟惟餘姚陸家曾收一卷精妙卓絕後歸孫
元規家矣

東丹王契丹天皇王之弟號人皇王名突欲後唐長興
二年投歸中國明宗賜姓李名贊華善畫本國人物鞍
馬多寫貴人酋長胡服鞍勒率皆珍華然而馬尚豐肥
筆乏壯氣

胡擢不知何許人善狀花鳥氣韻甚高博學能詩飄然

有物外之志嘗謂其弟曰吾思苦於三峽聞猿

擢有三峽聞猿

賦人多

又嘗吟曰甕中每醞逍遙藥筆下閒偷造化功

其高情逸興如此有鷗鷺圖全株石榴四時翎毛花果等圖傳於世

胡翼字鵬雲工畫佛道人物至於車馬樓臺無施而不妙趙嵩都尉頗禮遇之常延至門館有秦樓吳宮盤車

洗馬回紋豐稔等圖傳於世

時多求借自古名筆手自傳模裝成卷軸後題云安

定鵬
雲記

王殷工畫佛道士女尤精外國人物與胡翼並爲趙崇
都尉所禮他人無及也有職貢遊春士女等圖并粉本
佛像傳於世

李羣工畫人物爲時所稱有玄中澹師像孟說舉鼎赤
松子八戒醉客等圖傳於世

燕筠工畫天王獨躋周昉之妙有卷軸傳於世

杜霄工畫士女富於姿態妙得周昉之旨有韃鞨撲蛇

吳王避暑等圖傳於世

李玄應洎弟審並工畫蕃馬專學胡瓌有放馬白本胡
樂飲會弟林等圖傳於世

道士厲歸真異人也莫知其鄉里善畫牛虎兼工鷲禽
雀竹綽有奇思惟著一布裘入酒肆娼家每有人問其
所以輒大張口茹其拳而不言梁祖召問云君有何道
理歸真對曰衣單愛酒以酒禦寒用畫償酒此外無能
梁祖然之嘗遊南昌信果觀有三官殿夾紵塑像乃唐

明皇時所作體製妙絕常患雀鵲糞穢其上歸真乃畫一鷄於壁間自是雀鵲無復栖止有渡水牧牛牛虎鷄子柘竹野禽等圖傳於世

李靄之華陰人工畫山水寒林有江鄉之思鄴帥羅中令厚禮之爲建一亭爲援毫之所名金波亭時號金波李處士也有賣藥修琴歸山圖野人荷酒寒林并山水卷軸傳於世

韋道豐江夏人善畫寒林逸思奇僻不拘小節當代珍

之請揖不暇然經歲月方成一圖成則驚人故世罕有真蹟

朱簡章工畫人物屋木有禹治水神仙傳胡笳十八拍鳳樓十八怨烟波漁父等圖傳於世

王喬士工畫佛道人物尤愛畫地藏菩薩十王像凡有百餘本傳於世

鄭唐卿工畫人物兼長寫貌有梁祖名臣像并故事人物傳於世

關同一名種又王文康家圖上題云童長安人工畫山水學從荆浩有

出藍之美馳名當代無敢分庭敘論卷中具述有趙陽山居溪

山晚霽四時山水桃源早行等圖傳於世

支仲元鳳翔人工畫人物有老子誡徐甲蕭翼賺蘭亭

商山四皓等圖傳於世

梅行思或云再思江夏人工畫關雉名聞天下最著者是陳

康肅家籠雞一軸號爲神絕兼工人物有十才子河岳

精靈集舉人過關謝女詠梅寇豹騎牛等圖傳於世

郭乾暉將軍北海人工畫鷺鳥雜禽踈篁槁木格律老勁巧變鋒出曠古未見其比有秋郊鷹雉并逐禽鷄子架上鷄子等圖傳於世

鍾隱天台山人亦工畫鷺鳥竹木師郭乾暉淡得其旨乾暉始祕其筆灑隱變姓名趨汾陽之門服勤累月乾暉不知其隱也隱一日緣興於壁上畫鷄子一隻人有報乾暉者乾暉亟就視之且驚曰子得非鍾隱乎隱再拜具道所以乾暉喜曰孺子可教也乃善遇之丈席以

講畫道隱遂馳名海內焉兼工畫山水人物有鷹鷄雜禽周處斬蛟山水等圖傳於世

郭權江南人又師鍾隱亦有圖軸傳於世

史瓊善畫雉兔竹石有雪景雉兔竹下引雛野雉等圖傳於世

程凝善畫鶴竹兼長遠水有六鶴圖并折竹孤鶴湖灘遠水等圖傳於世

王道古善畫雀竹有四時雀竹并引雛鬬雀等圖傳於世

李坡南昌人惟善畫竹氣韻飄舉不事小巧有折竹風竹冒雪疎篁等圖傳於世

唐垓善畫野禽生菜水族諸物世稱精妙有柘棘野禽十種生菜魚蝦海物等圖傳於世

王道求工畫佛道鬼神人物畜獸始依周昉遺範後類盧楞伽之蹟多畫鬼神及外國人物龍蛇畏獸當時名手歎伏大相國寺有畫壁今多不存矣有十六羅漢拔鬼鍾馗第林師子等圖傳於世

宋卓工畫佛道志學吳筆不事傳彩有白畫菩薩粉本
坐神等像傳於世

富玫工畫佛道有彌勒內院圖白衣觀音觀珠地藏慈
恩灑師等像傳於世

左禮張南竝工佛道二人筆思不相遠有二十四化圖
十六羅漢三官十真人等像傳於世

王偉工畫佛道相國寺大殿等處舊有畫壁甚多今存
者無幾

黃延浩工畫人物有明皇吹玉笛五王同幄春園宴會
乞巧等圖傳於世

張質工畫田家風物有村田鼓笛村社醉散踏歌等圖
傳於世

韓求李祝竝工佛道學吳生陝郊龍興寺有畫壁

張圖河內雒陽人嘗事梁祖掌行軍糧籍故人呼爲張
將軍善潑墨山水兼長大像雒中廣愛寺有畫壁又嘗
見寇忠愍家有釋迦像一鋪鋒鉞豪縱勢類草書實奇

怪也

朱繇長安人工畫佛道酷類吳生碓中廣愛寺有文殊
普賢像長壽寺并河中府金真觀皆有畫壁

李昇成都人工畫蜀川山水始得唐張璪山水一軸凝
玩數日云未盡善矣後遂心師造化意出前賢成都聖
壽寺有畫壁多寫名山勝境仁顯云嘗於少監黃筌第

見昇山水圖乃知名實相稱也有武陵溪青城峨嵋二

十四化等圖傳於世

蜀中多呼昇爲小李將軍乃是思
訓之子思訓林甫之伯官至左武

衛大將軍子昭道爲太子中舍父子俱善畫因父故人呼昭道爲小李將軍也

杜楷成都人亦工畫山水多作老木懸崖回阿遠岫殊多雅思有秋日并州路詩意圖并山水卷軸傳於世亦工佛像

杜子瓌華陽人工畫佛道尤精傳彩調鉛殺粉別得其方嘗於成都龍華東禪院畫毘盧像坐赤圜光中碧蓮花上其圜光如初出日輪破淡無蹟人所不到也

杜弘義蜀郡晉平人工畫佛像高僧成都寶曆寺有文

殊普賢并水陸功德

房從真成都人工畫人物蕃馬事王蜀先主爲翰林待
詔嘗於蜀宮版障上畫諸葛武侯引兵渡瀘水人馬執
戴生動如神蜀主每行至彼駐而不進怡然歎曰壯哉
甲馬兼善撥筆鬼神亦多寺壁有寧王射獵陳登斫鱸
常建冒雪入京等圖傳於世

宋藝蜀郡人工寫貌事王蜀爲翰林待詔常寫唐朝列
聖及道士藥瀘善一行禪師沙門會海內臣高力士等

真於大慈寺

高道興成都人事王蜀爲內圖畫庫使工佛道雜畫用
筆神速觸類皆精蜀之寺觀尤多牆壁時諺云高君墜
筆亦成畫

阮知晦蜀郡人工畫貴戚子女兼長寫貌事王蜀爲翰
林待詔寫王先生真爲首出

杜覲龜其先本秦人避地居蜀博學強識工畫羅漢兼
長寫貌始師常祭後自成一體事王蜀爲翰林待詔成

都大慈寺有畫壁

黃筌字要叔成都人十七歲事王蜀後主爲待詔至孟蜀加檢校少府監賜金紫後累遷如京副使善畫花竹翎毛兼工佛道人物山川龍水全該六瀟遠過三師

花鳥

師刁處士山水師李昇人物龍水師孫遇也

孟蜀後主廣政甲辰歲淮南馳

聘副以六鶴蜀主遂命筌寫六鶴於便坐之壁因名六

鶴殿

蜀人自此方識真鶴六鶴集在故事拾遺卷中

由是蜀之豪貴請爲圖軸

者接蹟時諺云黃筌畫鶴薛稷減價又畫四時花鳥於

八卦殿鷹見畫雉連連掣臂遂命翰林學士歐陽炯作
記又寫白兔於縑素蜀主常懸坐側有四時山水花竹
雜禽鷺鳥狐兔人物龍水佛道天王山居詩意瀟湘八
景等圖傳於世

高從遇道興之子襲成父藝事孟蜀爲翰林待詔曾於
蜀宮大安樓下畫天王隊仗甚奇後遭兵火廢絕矣

阮惟德知晦之子紹精父業事孟蜀爲翰林待詔尤善
狀宮闈禁苑皇妃帝戚富貴之事有宮中賞春公子夜

宴按舞尉帛等圖傳於世

杜敬安醜龜之子繼父之美事孟蜀爲翰林待詔尤能傳彩成都大慈寺多與其父同畫列壁

黃居寶字舜玉筌之次男也少聰警多能與其父同事蜀爲待詔後累遷水部員外郎亦工畫花鳥松石兼善八分年未四十而卒

趙元德長安人天復中入蜀雜工佛道鬼神山水屋木偶唐季喪亂之際得隋唐名手畫樣百餘本故所學精

博有漢高祖過豐沛盤車講學豐稔圖傳於世

趙忠義元德之子事孟蜀爲翰林待詔雖從父訓宛若
生知蜀後主嘗令畫關將軍起玉泉寺圖作地架一座
重昂疊拱向背無失蜀主命匠氏較之無一差者其精
妙如此嘗與高道興黃筌輩同畫成都寺壁甚多

蒲師訓蜀人事孟蜀爲翰林待詔師房從真嘗携畫詣
從真從真高蹈拊膺曰子之所得非吾所授也畫蜀中
祠廟鬼神兵仗冠冕幢葆皆盡其美

蒲延昌師訓之子與其父同時爲孟蜀待詔工畫佛道鬼神外尤精師子行筆勁利用色不繁

張孜成都人事孟蜀爲翰林祇候工畫人物士女兼長寫貌有長門醉客按樂擣衣等圖及漢唐名臣像傳於世

徐德昌成都人事孟蜀爲翰林祇候工畫人物士女墨彩輕媚爲時所稱

周行通成都人工畫鬼神人馬鷹犬嬰孩得其精要有

李陵送蘇武支遁三雋奪馬等圖傳於世

張玄簡州金水石城山人善圖僧相畫羅漢名播天下
欄金水張家羅漢也

孔嵩蜀人善畫龍兼工蟬雀與黃筌竝師刁處士成都
廣福院壁有所畫龍及有蟬雀等圖傳於世

丘文播暨弟文曉廣漢人竝工佛道人物兼善山水其
品降高趙輩成都并其鄉里頗有畫蹟文播後改名潛
趙才蜀人工畫鬼神人物亦長甲騎蜀川多有遺蹟

滕昌祐其先吳人避地居蜀工畫花鳥蟬蜨折枝生菜
筆蹟輕利傳彩鮮澤尤於畫鵝得名有四時花鳥魚龜
猴兔及梅花鵝茴香下睡鵝又有群鵝泛蓮沼等圖傳

於世

兼善書大字蜀中寺
觀牌額多昌祐書

姜道隱漢州什邡人齟歲好畫有時終日不歸父母尋
之多在佛廟神祠中畫壁下及長不事產業惟畫是好
布衣芒屨隨身筆墨而已嘗於淨衆寺方丈畫山水松
石宋王庭隱贈之束縑道隱置於僧堂拂衣而去

楊元真不知何許人工畫佛道善爲曹筆尤精布色始居蜀後召入鄴中不回蜀川頗有畫蹟

黃從誨成都人世本儒家心游繪事佛道人物舉意皆精成都福感寺有畫壁

張景思蜀人工畫佛道蜀中有畫壁

跋異汧陽人工畫佛道鬼神洛中福先寺有畫壁其品次張圖也

王仁壽汝南宛人工畫佛道鬼神兼長鞍馬始師王殷

後學精吳灋晉末爲契丹所掠太祖受禪放還相國寺
文殊院有淨土彌勒下生二壁淨土院有八菩薩像及
有征遼獵渭等圖傳於世

衛賢京兆人事江南李後主爲內供奉工畫人物臺閣
初師尹繼昭後服膺吳體張文懿家有春江釣叟圖上
有李後主書漁父詞二首其一曰閨苑有意千重雪桃
李無言一隊春一壺酒一竿鱗快活如儂有幾人其二
曰一棹春風一葉舟一綸繭縷一輕鈎花滿渚酒盈甌

萬頃波中得自由有聖賢宮滕王閣盤車水磨等圖傳
於世

朱惛不知何許人與衛賢竝師尹繼昭而衛爲高足

曹仲玄建康豐城人事江南李後主爲翰林待詔工畫
佛道鬼神始學吳不得意遂改蹟細密自成一格尤於
傳彩妙越等夷江左梵宇靈祠多有其蹟

陶守立池陽人江南李後主保大間應舉下第退居齊
山以詩筆丹青自娛工畫佛道鬼神山川人物至於車

馬臺閣筆無偏善常於九華草堂壁畫山程早行圖及
建康清涼寺有海水李後主金山水閣有十六羅漢像
皆振妙於時也

竹夢松建康溧陽人事江南李後主爲東川別駕工畫
人物子女宮殿臺閣巧絕冠代

丁謙晉陵義興人工畫竹兼善寫蔬果寇忠愍家有寫
蔥一軸上有李後主題丁謙二字非凡格也

此畫今歸
王晉卿都

家尉

何遇江南人善畫林石屋木學慕衛賢深得其趣

陸晁嘉禾人善畫田家人物意思疎野落筆成像不預
構思故所畫卷軸或爲絕品或爲末品也

施璘京兆藍田人工畫竹有生意

禪月大師貫休婺州蘭溪人道行文章外尤工小筆嘗

觀所畫水墨羅漢云是休公入定觀羅漢真容後寫之

故悉是梵相形骨古怪其真本在豫章西山雲堂院供

養于今郡將迎請祈雨無不應驗

休公有詩集行於世
兼善書謂之姜體以

其俗姓
姜也

僧楚安蜀人善畫山水點綴甚細每畫一扇上安姑蘇臺或滕王閣千山萬水盡在目前今蜀中扇面印板是

其遺範

仁顯云筆蹤細碎全虧六法非大手高格也

僧傳古大師四明人善畫龍水得名於世

叙集卷中已述

皇建

院有所畫屏風見存弟子岳闍黎授學於師其品次之
僧智蘊河南人工畫佛像人物學深曹體維中天宮寺
講堂有毘盧像廣愛寺有定光佛福先寺有三災變相

數壁周祖時進舞鍾馗圖賜紫衣

僧德符善畫松柏氣韻蕭灑曾於相國寺灌頂院廳壁
畫一松一柏觀者如市賢士大夫畱題凡百餘篇其爲
時推重如此以上各有圖軸傳於世

圖畫見聞誌卷二

欽定四庫全書

圖畫見聞誌卷三

宋 郭若虛 撰

仁宗皇帝天資穎悟聖藝神奇遇興援毫超逾庶品伏
聞齊國獻穆大長公主睿明之始上親畫龍樹菩薩命
待詔傳模鏤版印施聖心仁孝又非愚臣所能稱頌若
虛舊有家藏御畫御馬一疋其毛赭白玉銜勒上有宸
翰題云慶厯四年七月十四日御畫兼有押字印寶後
因伯父內藏借觀不日赴杭鈴之任既久假而不歸居

無何伯父終於任所此寶遂歸伯母表兄張湍少列今

不復可見爲終身之痛

兼曾見張文懿家有小猿一軸仍聞禁中有天王菩薩像

太上游心難可與臣下並列故尊之卷首

紀藝中

聖朝建隆九年後至熙寧七年總一百五十八人

王公士大夫依仁游藝臻乎極至者一十三人

燕恭肅王

嘉王

李後主

燕肅

武宗元

劉永年

郭忠恕

王士元

宋道

宋迪

文同

郭元方

董源

燕恭肅王位尊磐石名重戚藩天縱多能精於像物嘗
觀所畫鶴竹雪毛丹頂傳警露之姿翠葉霜筠盡含烟
之態亦嘗自朽十六羅漢令蜀人尹質描染稜稜風骨
類非常格所能及

聞朱邱甚有遺蹟世罕得見



皇弟嘉王維城茂美副茅土之強宗醴席餘休命毫煤而取適嘗觀所畫墨竹圖位置巧變理應天真作用縱橫功齊造化復愛狀蝦魚蒲藻筍籜蘆花雖居紫禁之中頗得滄洲之趣筆意超絕殆非學而知之者矣

王尤精篆

籀有盡六幅嫌止書一字者筆力神俊可謂驚絕

江南後主李煜才識清膽書畫兼精

書名金錯刀

嘗觀所畫

林石飛鳥遠過常流高出意外金陵王相家有雜禽花
木李忠武家有竹枝圖皆希世之玩

燕肅字穆之其先燕薊人後徙家曹南位龍圖閣直學士以尚書禮部侍郎致政文學治行外尤善畫山水寒林澄懷味象應會感神蹈摩詰之遐蹤逼咸熙之懿範太常寺有所畫屏風玉堂刑部景寧坊居第暨許雒佛寺中皆有畫壁公以壽終於康定元年贈太尉公畫與所藏古筆僅百卷皆取入禁中故人間所傳圖軸幾稀矣

公凡莅州郡作刻漏法最精又嘗被旨造指南車皆出奇思

武宗元字總之河南白波人官至虞曹外郎善畫佛道

人物筆術精高曹吳具備嘗於維都上清宮畫三十六
天帝其間亦明陽和天帝潛寫太宗御容以趙氏火德
王天下故真宗祀汾陰還經維都幸上清歷覽繪壁忽
覩聖容驚曰此真先帝也遽命設几案焚香再拜且歎
其畫筆之神竚立久之上清即唐玄宗皇帝廟舊有吳
生畫五聖圖杜甫詩稱五聖聯龍袞千官列雁行是也
後因增廣庭廡畫壁遂廢宗元復運神蹤高紹前哲張
文懿有詩云曾此焚香對聖容宗元又嘗於廣愛寺見

吳生畫文殊普賢大像因杜絕人事旬餘刻意臨倣蹙
成二小幀骨法停分神冠氣格天衣纓絡乘跨部從與
大像不差毫釐自非靈心神悟感而遂通者孰能與於
此哉許昌龍興寺北廊有帝釋梵王及經藏院有旃檀
瑞像嵩嶽廟有出隊壁皆所竒絕初名宗道後改名宗
元以壽終於皇祐二年有佛像天王九子母等圖傳於
世

溪州防禦使劉永年字君錫章獻明肅皇后之姪也才

敏有神力兼於畫筆錯總萬類非常格可擬

郭忠恕字恕先雒陽人少能屬文七歲舉童子初周祖
召爲博士後因爭忿於朝堂貶崖州司戶秩滿去官不
復仕縱放岐雍陝雒之間善畫屋木林石格非師授有
設紈素求爲圖畫者必怒而去乘興即自爲之郭從義
鎮岐下每延至山亭張素設粉墨於旁經數月忽乘醉
就圖之一角作遠山數峯而已郭氏亦珍惜之岐有富
人主官酒酤其子喜畫日給醇酎設几案絹素及好紙

數軸屢以情言忠恕俄取紙一軸凡數十番首畫一升
角小童持線車紙窮處作風鳶中引一線長數丈富家
子不以爲奇遂謝絕太宗素知其名召赴闕下授以國
子監主簿忠恕益縱酒肆言時政頗有謗讟上惡之配
流登州死於齊之臨邑道中尸解焉有屋木卷軸傳於
世忠恕尤精字學宋元憲嘗手
校忠恕佩觿三篇寶玩之

推官王士元仁壽之子也靈襟蕭爽畫法特高人物師
周昉山水學關同屋木類郭忠恕皆造其微嘗見張文

懿家有雜木寒林高丈餘風韻遒舉格致稀奇兼有伊尹負鼎鳳樓十八怨四時山水等圖傳於世

宋道字公達雒陽人宋迪字復古二難皆以進士擢第今竝處名曹悉善畫山水寒林情致嫺雅體像雍容今

時以爲祕重矣

然則友愛之談所宜推揖

文同字與可梓潼永泰人今爲司封員外郎祕閣校理善畫墨竹富蕭灑之姿逼檀欒之秀疑風可動不筍而成者也復愛於素屏高壁狀枯槎老枿風旨簡重識者

所多

郭元方字子正京師人官至內殿承制善畫草蟲備究
蜚蠊潛分造化宜矜妙藝藹播佳名然而著意者不及
疏畧蓋點綴過當翻爲失真頗有圖軸傳於世

董源字叔達鍾陵人事南唐爲後苑副使善畫山水水
墨類王維著色如李思訓兼工畫牛虎肉肌豐混毛毳
輕浮具足精神脫畧凡格有滄湖山水著色山水春澤
放牛牛虎等圖傳於世

高尚其事以畫自娛者二人

李成

宋 澣

李成字咸熙其先唐宗室避地營丘因家焉祖父皆以儒學吏事聞於時至成志尚冲寂高謝榮進博涉經史外尤善畫山水寒林神化精靈絕人遠甚

叙論卷中已述開寶

中都下王公貴戚屢馳書延請成多不荅學不爲人自娛而已後遊淮陽以疾終於乾德五年子覺尤以經術知名職踐館閣請恩幽閔贈光祿丞

事見宋白所撰墓碣有煙嵐

曉景風雨四時山水松栢寒林等圖傳於世

宋澥字則未聞長安人故樞密湜之弟司封道之從祖也姿度高潔不樂從仕圖書之外無所嬰心善畫山水林石凝神遐想與物冥通遇興登樓有時操筆故人間不多見其蹟有煙嵐曉景奔灘怪石等圖傳於世

業於繪事馳名當代者一百四十六人

人物山水花鳥

雜畫分
爲四門

人物門

五十三人僧道并
獨工傳寫者附

王 霽

高 益

王 瓘

孫夢卿

趙光輔

趙隱士

孫知微

勾龍爽

李文才

石 恪

袁仁厚

趙長元

王齊翰

周文矩

顧德謙

郝 處

厲昭慶

顧洪祝

李雄

侯翼

高文進

王道真

李用及

李象坤

高懷節

張昉

高元亨

楊肫
子圭

王兼濟

張懷悅

陳用智

孟顯

陳士元

王拙

王居正

葉進成

葉仁遇

郝澄

童仁益

毛文昌

南簡

龍章
子淵

武洞清

江惟清

鍾文秀

田景

李元濟

王易

陳坦

令宗

李八師

劉道士

王靄京師人工畫佛道人物長寫貌五代間以畫聞晉
末與王仁壽皆爲契丹所掠太祖受禪放還授圖畫院
祇候遂使江表潛寫宋齊丘韓熙載林仁肇真穢旨改
翰林待詔今定力院太祖御容梁祖真像皆靄筆也
御容潛龍時寫後改裝中央服矣又畫開寶寺文殊閣下天王及景德
寺九曜院彌勒下生像最爲奇出

高益涿郡人工畫佛道鬼神蕃漢人馬太祖朝潛歸京師始貨藥以自給每售藥必畫鬼神或犬馬於紙上藉藥與之由是稍稍知名時太宗在潛邸外戚孫氏喜畫孫氏有酒樓一日遇四老人飲酒有異疑其神仙因謂之四皓樓亦謂孫氏爲孫四皓也因厚遇益

請爲圖畫未幾太宗龍飛孫氏以益所畫搜山圖進上遂授翰林待詔後被旨畫大相國寺行廊阿育王等變相暨熾盛光九曜等有位置小本藏於內府後寺廊兩經廢置皆飭後輩名手依樣臨倣又畫崇夏寺大殿善

神筆力絕人有南國鬪象衛士騎射蕃漢出獵等圖傳於世

王瓘河南雒陽人工畫佛道人物淡得吳法世謂之小吳生石中令嘗令畫雜中昭報寺壁及有佛道功德故事人物等傳於世

孫夢卿東平人工畫佛道人物亦專吳學尤長寺壁謂之孫脫壁嘗與王霑對畫開寶寺文殊閣下西北方毘樓博叉天王像并大相國寺甚有其蹟今多不存矣

趙光輔華原人工畫佛道兼精蕃馬筆鋒勁利名刀頭
燕尾太祖朝爲圖畫院學生故鄉里呼爲趙評事許昌
開元龍興兩寺皆有畫壁浴室院地獄變尤佳有功德
蕃馬等圖傳於世

隱士趙雲子善畫道像於青城夫人觀畫諸仙奇絕孫
太古嘗陰使人問已畫趙云孫畫雖善而傷豐滿乏清
秀氣孫由是感悟

孫知微字太古眉陽人精黃老學善佛道畫於成都壽

寧院畫熾盛光九曜及諸牆壁時輩襴服知微凡畫聖
像必先齋戒疏淪方始援毫有功德并故事人物傳於
世知微始畫壽寧九曜也令童仁益輩設色其水聖侍
從有持水晶瓶者因贈蓮花於跼中知微既見愀然
曰跼所以鎮天下之水吾得之道經今
則奚以花爲嗟乎畫蛇著足失之遠矣

勾龍爽蜀人國初爲翰林待詔工畫佛道人物善爲古
體衣冠精裁密緻亦一代之奇筆也有功德并故事人
物傳於世

李文才華陽人工畫松石兼長寫貌事孟蜀爲翰林待

詔廣政中荆南高王令人入蜀請文才寫義興門街雙
筍石并其故事又嘗寫蜀主并名臣真像於大慈寺亦
有圖軸傳於世

石恪蜀人性滑稽有口辯工畫佛道人物始師張南本
後筆畫縱逸不專規矩蜀平至闕下嘗被旨畫相國寺
壁授以畫院之職不就堅請還蜀詔許之不樂都下風
物頗有譏誚雜言或播人口有唐賢像五丁開山巨靈
擘太華新羅人角力等圖傳於世

袁仁厚蜀人早師李文才乾德中至闕下未久還蜀因求得前賢畫樣十餘本持歸平居以畫自適終老鄉閭蜀川亦有遺蹟

趙長元蜀人工畫佛道人物兼工翎毛初隨蜀主至闕下隸尚方彩畫匠人因於禁中牆壁畫雉一隻上見之嘉賞尋補圖畫院祇候今東太一貴神像華嚴院十六羅漢竝長元筆

王齊翰建康人事江南李後主爲翰林待詔工畫佛道

人物開寶末金陵城陷有步卒李貴入佛寺中得齊翰所畫羅漢十六軸尋爲商賈劉元嗣以白金二百星購得貴入京師復於一僧處質錢後元嗣詣僧請贖其僧以過期拒之因成爭訟時太宗尹京督出其畫覽之嘉歎遂畱畫厚賜而釋之經十六日太宗登極後名應運羅漢

周文矩建康句容人事江南李後主爲翰林待詔工畫人物車馬屋木山川尤精士女大約體近周昉而更增

纖麗有貴戚遊春擣衣熨帛繡女等圖傳於世

顧德謙建康人工畫人物風神清劭舉無與比李後主
愛重之嘗謂曰古有凱之今有德謙二顧相望繼爲畫
絕矣識者以爲知言呂文靖家有蕭翼說蘭亭故事橫
卷青錦標飾碾玉軸頭實江南之舊物窺其風格可知
非謬也

郝處江南人工畫佛道鬼神兼長寫貌本一商賈酷好
圖畫因而家產蕩盡惟學畫耳

厲昭慶建康豐城人工畫人物事江南爲翰林待詔後
隨李後主至闕下授圖畫院祇候

顧洪祝不知何許人工畫人物傳其名而未見其蹟

李雄北海人工畫佛道偏長鬼神罕有倫比太宗朝爲
圖畫院祇候因忤旨遷去北海龍興寺有畫壁

侯翼安定人工畫佛道人物夙振吳風窮乎奧旨長安
雄汭寺壁尤多兼有三教聖像故事人物等傳於世

高文進從遇之子工畫佛道曹吳兼備乾德乙丑歲蜀

平至闕下時太宗在潛邸多訪求名藝文進往依焉後以攀附授翰林待詔未幾重修大相國寺命文進倣高益舊本畫行廊變相及太一宮壽寧觀啟聖院暨開寶塔下諸功德牆壁率皆穢旨又勅令訪求民間圖畫繼蒙恩獎相國寺大殿後擎塔天王如出牆壁及殿西降魔變相其蹟存今畫院學者咸宗之然曾未得其髣髴耳

王道真蜀郡新繁人工畫佛道人物兼長屋木太宗朝

用高文進薦引授圖畫院祇候嘗被旨畫相國寺并玉清昭應宮壁今相國寺殿東畫給孤獨長者買祇陀太子園因緣并殿西畫誌公變十二面觀音像其蹟並存李用及李象坤並工畫佛道人馬尤精鬼神嘗與高文進王道真同畫相國寺壁並爲良手殿東畫牢度久闕聖變相其蹟見存

高懷節文進長子太宗朝爲翰林待詔頗有父風嘗與其父同畫相國寺壁兼長屋木爲人欄愛也

張昉臨汝人工畫佛道人物蹟專吳體嘗畫玉清昭應宮奏樂天女高丈餘掇筆而成本郡開元寺有畫壁亦佳手也

高元亨京師人工畫佛道人物兼長屋木多狀京城市肆車馬有遊瓊林苑角觝夜市等圖傳於世

楊肱京師人後家泗上工畫佛道人物尤於觀音得名天下然而手足間時或小失停分蓋於骨法用筆跨邁倫等是其小疵不足以累大醇亦愛畫西南夷人妙得

其旨

盛傳楊
拙沒斯

子圭有父風

王兼濟河南雒陽人工畫佛道鬼神雒中南宮有十太
一像嵩嶽廟與武虞曹對畫牆壁武畫出隊兼濟畫入
隊衆所傳播也

孫懷悅安定靈臺人工畫佛道人物學吳生爲得法雒
中有寺壁

陳用智潁川堰城人天聖中爲圖畫院祗候未久罷歸
鄉里工畫佛道人馬山川林木精詳巧瞻難跨伊人但

意務周勤格乏清致有功德蕃馬故事人物等傳於世

用智居小窯鎮
多謂之小窯陳

孟顯安化華池人工畫佛道鬼神人馬屋木大率作用

氣格略與陳用智相似

多謂之小孟亦云紅樓孟家

陳士元京師人善畫人物屋木有嘉慶圖故事人物傳

於世

王拙河東郡人工畫佛道人物初畫玉清昭應宮壁選

中右第一

王居正拙之子善畫士女酷學周昉精密有餘而氣韻不足

葉進成江南人工畫人物嘗見楊褒虞曹家醉道圖頗得閭令之體

葉仁遇進成族弟工畫人物多狀江表市肆風俗田家人物

郝澄金陵句容人工畫佛道鬼神學通相術精於傳寫以上各有圖軸傳於世

童仁益蜀郡人工畫人物尊像出自天資不由師訓乃
孫知微之亞矣嘗畫青城山丈人觀諸仙淳化末以成
都天慶觀仙遊閣下舊有石恪畫左右龍虎君仁益遂
抒思授毫于天慶觀前亦畫龍虎君兩壁及畫大慈寺
中佛殿漢孝明帝摩騰竺法三藏保福院畫首楞嚴二
十五觀筆力尤健頗有圖軸傳於輦下好事者往往誤
評爲知微之筆也

毛文昌蜀郡人工畫田家風物有江村晚釣村童入學

郊居豐稔等圖傳於世

南簡平涼人工畫佛道人物世傳其名未見其蹟

龍章京兆櫟陽人工畫佛道人物兼工傳寫尤善畫虎
曾有貨藥人楊生檻中養一虎章因就視寫之故畫虎
最臻形似子淵有父風

武洞清長沙人工畫佛道人物特爲精妙有雜功德十
一曜二十八宿十二真人等像傳於世

鍾文秀京師人今爲翰林待詔工畫佛道人物兼學關

同山水有功

田景慶陽人工畫人物有奇思嘗得一扇面畫三教作二童奕碁於僧前一則秉勝而矜誇一則敗北而悔沮僧臨視而笑瞻顧如生惜景孤貧聲聞不顯後之陳留不知所終

李元濟太原人工畫佛道人物精於吳筆熙寧中召畫相國寺壁命官較定衆手時元濟藝與崔白爲勑敵議者以元濟學導師法不妄落筆遂推之爲第一其間佛

鋪多是元濟之蹟也

王易鄜州人亦工畫佛道人物學隣元濟時同畫相國寺壁畫畢各歸鄉里都人稱伏之

陳坦晉陽人工畫佛道人物都下奉先普安二佛刹尤多功德牆壁相國寺北廊高僧乃坦所畫其於田家固爲獨步有村鑿村學田家娶婦村落祀神移居豐社等圖傳於世

僧令宗廣漢人工畫佛道人物成都大慈寺三學院并

揭諦堂有畫壁

道士李八師

亡其名

邛州依政人於本縣崇聖觀披挂工

畫道門尊像青城山丈人觀有畫壁

劉道士

亡其名

建康人工畫佛道鬼神落筆道怪江南寺

觀時見其蹟尤愛畫甘露佛多傳於世

獨工傳寫者七人

牟谷

高太沖

尹質

歐陽夔

元 霽

維 真

何 充

牟谷不知何許人工相術善傳寫太宗朝爲圖畫院祇候端拱初詔令隨使者往交趾寫安南王黎栢及諸陪臣真像畱止數年既還屬宮車晏駕未蒙恩旨間居閭闔門外久之真宗幸建隆觀谷乃以所寫太宗正面御容張於戶內上見之敕中使收赴行在詰其所由谷具以實對上命釋之時太宗御容已令元霽寫畢乃更令

谷寫正面御容尋授翰林待詔能寫正面惟谷一人

高太沖江南人工傳寫事李中主爲翰林待詔嘗寫李中主真得其神思

尹質蜀人工傳寫嘗寫燕王真頗蒙顧遇有藥王像孫思邈像并畫猴傳於世

歐陽夔京師人工傳寫宗侯貴戚多所延請其藝真僧維真相抗餘無出其右者

僧元靄蜀人自幼入京依定力院輪公落髮妙工傳寫

爲太宗朝供奉一日在禁中傳寫爲一小黃門毀辱遍
問同列無肯道其姓名者靄乃草一頭子懷之見都知
李神福訴以毀辱之事神福曰小底至多不得其名誰
受其責靄乃探懷中頭子示之李一見嗟訝曰此鄧某
也亡其名何其倉卒之閒傳寫如此之妙因召鄧責誚伏
過而去

僧維真嘉禾人工傳寫嘗被旨寫仁宗英宗御容賞賚
殊厚元靄之繼矣名公貴人多召致傳寫尤以善寫貴

人得名

何充姑蘇人工傳寫擅藝東南無出其右



圖畫見聞誌卷三